

Katika Ukingo wa Zahama ya Ajabu,

Ole wake siku hii! Kwa maana siku ya Bwana inakaribia, nayo itakuja kama uangamivu utokao kwake aliye Mwenyezi. Yoeli 1:15.

Leo dalili za nyakati zinaonesha ya kwamba tumesimama kwenye ukingo wa matukio makubwa na mazito. Kila kitu katika ulimwengu wetu kipo kwenye msukosuko. Mbele ya macho yetu unatimia unabii wa Mwokozi wa matukio yatakayotangulia ujio Wake: “Nanyi mtasikia habari za vita na matetesi ya vita. Kwa maana taifa litaondoka kupigana na taifa, na ufalme kupigana na ufalme; kutakuwa na njaa, na tauni na matetemeko ya nchi mahali mahali” (Mathayo 24:6, 7).

Sasa ni wakati nyeti mno kwa wote wenye uhai. Watawala na wakuu wa serikali, watu walio na vyeo na mamlaka ya kutumainiwa, wanaume na wanawake wa matabaka yote, umakini wao umewekwa kwenye matukio yanayotokea mbele zetu. Wanaangalia mahusiano yaliyopo kati ya mataifa. Wanaona uzito unaochukuliwa kwa kila kipengele cha kidunia, na wanatambua ya kwamba kuna jambo kubwa na la kufanyia maamuzi litatokea—kwamba ulimwengu uko ukingoni mwa janga la kustaajibisha.

Biblia, na Biblia pekee, ndiyo inatoa mtazamo sahihi juu ya mambo haya. Hapa panafunuliwa matukio makuu ya mwisho katika historia ya ulimwengu wetu, matukio ambayo tayari vivuli vyake vilikuwepo tangu hapo awali, sauti za kukaribia kwake zinasababisha dunia kutetemeka na mioyo ya wanadamu kuzimia kwa woga.

“Tazama, Bwana ameifanya dunia kuwa tupu, aifanya ukiwa, aipindua, na kuwatawanya wakaa ndani yake...kwa sababu wameziasia sheria, wameibadili amri, wamelivunja agano la milele. Ndiyo sababu laana imeila dunia, nao wakaa ndani yake wanakuwa ukiwa.” (Isaya 24:1-6) ...

“Naumwa katika moyo wangu wa ndani siwezi kunyamaza; kwa sababu umesikia, Ee nafsi yangu, sauti ya tarumbeta, mshindo wa vita.... Uangamivu baada ya uangamivu umetangazwa; kwa maana nchi yote imeharibika.” (Yeremia 4:19, 20) ...

“Kwa kuwa Wewe Bwana ndiwe kimbilio langu; Umemfanya Aliye juu kuwa makao yako. Mabaya hayatakupata wewe, Wala tauni haitaikaribia hema yako.” (Zaburi 91:9, 10) ...

Mungu hataliangusha kanisa Lake katika saa ya hatari yake kuu. Ameahidi ukombozi. “Tazama, nitarudisha tena hema za Yakobo zilizohamishwa,” ametangaza “na kuyahurumia makao yake” (Yeremia 30:18). Ndipo kusudi la Mungu litakapotimizwa; amri za ufalme wake zitaheshimiwa na wote duniani (Manabii na Wafalme 371, 372).